



**JUDICIAL SYSTEM MONITORING PROGRAMME**  
**PROGRAMA DE MONITORIZAÇÃO DO SISTEMA JUDICIAL**

***Komunikado Imprensa***

Periodu : Abril 2010

Pubikasaun : Abril 2010

**Loron Daruak, debata Lei Kontra Violensia Domestika Iha Komisaun A La Realiza Tanbá Quorum La To'o**

Proposta Lei Kontra Violensia Domestika Nu.31/II/2009 ne'ebé pasa jeneralidade iha plenaria Parlamentu Nasional, komesa tama ona diskusaun espesifiku iha Komisaun A, nu'udar Komisaun ne'ebé mak hare ba asuntu Konstituisaun, Justisa, Administrasaun publiku, poder lokal no lejislasaun governu nian.

Iha loron Quarta-Feira 14 Abril 2010, nu'udar loron ba dahuluk Komisaun A halo diskusaun spesifiku iha salaun konferensia Parlamentu Nasional nian. Membrus Komisaun A ne'ebé marka prezensa iha salaun konferensia hamutuk nain 8 husi total membrus Komisaun A nain 12. Aleinde ne'e iha mos membru komisaun seluk ne'ebé mak hola parte iha diskusaun ne'e. Sosiadade sivil liu husi NGOs nasional no internasional sira ne'ebé mak durante ne'e partisipa ativu iha preparasaun ba Proposta Lei Kontra Violensia Domestika, iha entuziasmu makaas hodi tuir debate representante povu nian iha uma fukun Parlamentu. Aleinde ne'e, husi parte governu nian, Sekretaria Estadu Promosaun Igualidade Sra. Idelta Rodrigues ho nia komitiva mak hola parte iha debate ne'e.

Iha loron dahuluk debate ba lei kontra violensia domestika, iha entuziasmu makaas husi membru deputadus komisaun A ne'ebé mak marka prezensa no mos membrus komisaun seluk nian, hodi hato'o sira nia hanoin kona ba proposta lei refere. Maibe dala ida tan membrus deputadu balun husi Komisaun A la halo tuir rezimento Parlamentu Nasional nian tuir alinea a numeru 1 artigu 10 ne'ebé define katak; *deveres deputadu sira nian mak hanesan, deputadu sira tenki kumpri oras servisu hodi partisipa iha sesaun plenaria no reuniaun komisaun tomak.* Tuir agenda ne'ebé mak Komisaun A iha, debate sei hahu iha oras tuku 15.00 Lorokraik maibe adia fali ba tuku 16.00 Lorokraik, wainhira atu hahu debate Prezidente Komisaun A husu ba nia membrus sira atu fo tempu liu uituan hodi bele debate lei ida ne'e, maibe deputadu balun fo kedas sira nia kritika katak, se oras servisu hotu ona alias tuku 18.00 debate tenki para. Relasiona ho ida ne'e tempu ba Komisaun A hodi halo debate ba lei kontra violensia domestika limitadu tebes, ne'e duni iha loron dahuluk debate nian proposta lei refere, halo diskusaun no votasaun ba artigu 1 ho 2 deit.

Iha loron daruak debate nian, Prezidente Komisaun A ho deputadu balun, hamutuk ho media no sosiadade sivil ne'ebé mak mai halo observasaun ba aktividade komisaun A nian, hahu mai marka prezensa iha salaun konferensia Parlamentu Nasional nian iha tuku 09.00 dader, maibe hein to'o tuku 10.30 dader Deputadu Komisaun A ne'ebé marka prezensa nain lima deit ne'e duni quorum la to'o atu halo debate no votasaun, ikus mai deputadu sira desidi hodi fahe malu tanbá loron besik meudia ona.

Hare ba situasaun ne'e nune Deputada Fernanda Borges nu'udar Prezidente Komisaun A no Prezidente partidu politika PUN , afirma katak deputadu sira ne'ebé la bele marka prezensa no justifikada, bele lui husi prezidente bankada atu substitui membrus sira seluk ba nia fatin hodi nune komisaun bele hetan quorum, hodi halao debate no votasaun. Ida ne'e ita bele hare iha rezimentu parlamentu Nasional artigu 5 nebe deklarasaun, *substituissau temporaria*. *Deputadu sira bele hetan lisensa loron tolu, antes apresenta sira nia razaun, liu husi bankada parlementer nebe pertensia, hodi justifika pedido sira nia faltas no bele halo substituissau temporaria ba sira nia mandatu.*

Tuir JSMP nia hanoin katak, deputadu balun seidauk kompriende didiak kona ba sira nia funsaun no papel tuir rezimentu Parlamentu Nasional nian. Aliende ne'e deputadu sira balun la hatudu sira nia sentidu responsabilidade institusional nu'udar orgaun soberania Estadu nian hodi reprezenta, defende, soi kbit politiku atu halo lei, fiskaliza no hola desizaun politiku tuir saida mak estipula iha Artigu 92 Konstituissau da Republika. Ignoransia responsabilidade institusional ne'ebé bele hare liu prosesu diskusaun espesialidade ba lei kontra violensia domestika ne'ebé mak povu hein iha tinan barak nia laran atu hetan aprovasaun no promulgasaun. Maibe realidade, hatudu katak deputadu sira ne'ebé mak soi kbit konstitusional hodi reprezenta, defende no halo desizaun politiku ne'ebé lori benefisiu no impaktu pozitivu ba prosesu harii nasaun nian. Tanba ne'e, JSMP husu ho hakraik an no respeitu ba Distintus Deputadu sira, atu kumprinde diak liu distintus sira nia papel tuir kbit ne'ebé lei fo fatin no hatuur interese povu nian ass liu interese sira seluk.

JSMP hein katak esperensia sira hanesan ne'e sei la akontese tan sira iha tempu sira tuir mai nune'e povu bele tau fiar no esperansa katak Parleментu Nasional nu'udar sentru ba lian povu nian, hodi reprezenta, defende no asegura interese povu nia iha Uma Fukun Parlamentu Nasional no sai uma ba povu nian.

Atu hetan informasaun kle'an favor kontaktu:  
Luis de Oliveira Sampaio  
Direitor Ezekutivu JSMP  
Direasaun e-mail: [luis@jsmp.minihub.org](mailto:luis@jsmp.minihub.org)  
Landline: 3323883